

河防

沔陽志八

凡水在上流者江漢最大其流俱至雲夢而合地窪水豬故為巨澤當堯之時洪水橫流禹治水荊州導漢過三筵至于大別導江過九江至于東陵沱潛既道然後雲土夢作又傳言水落而土見可耕治也周官職方氏荊州之藪曰雲夢漢司馬相如賦子虛稱楚有七澤雲夢其一澤方九百里此皆作乂之餘至周迄漢猶為藪澤杜預曰雲夢跨江南北郭璞曰安陸枝江俱

志八

河防

一

有雲夢城胡三省曰雲夢甚廣後世悉為邑居聚落則易藪澤為墳壤矣蓋漢最濁漢書云河水一石而六斗泥涇水一石其泥數斗漢水之泥亦不啻是每與江湖水合其滓必澄故常填淤而沮澤之區因成沃野南宋張興世居臨沔水門前忽生洲嶼大數十頃是一證也惟江清不易淤然荊州記江陵初有九十九洲後其洲滿百則江亦有時而淤蓋所謂土作乂者其由來者久矣故沔居澤中土惟塗泥而竟陵雲杜

頗多高印之田民漸芟剔墾為阡陌然江溢則
沒東南漢溢則沒西北江漢並溢則洞庭沔湖
匯為巨壑雖堯橫流之時禹未導之日不是過
也故民田必因地高下修隄防障之大者輪廣
數十里小者十餘里謂之曰院如是百餘區其
不可隄者悉棄為萊蕪萊蕪之地常多於院漢
賈讓曰內黃界中有澤方數十里環之有隄民
起廬舍其中東郡白馬黎陽故大隄皆數重民
居其間其制頗與院同蓋自漢已然矣漢唐以

志八

河防

二

來沔隄修廢無所於攷五代時高季興節度荆
南築隄以障漢水自荆門綠麻山至潛江延亘
百三十里因名高氏隄而江隄亦自監利東接
漢陽長百數十里不知何時所築名長官隄沔
皆賴焉宋乾道七年湖北漕臣李燾請修江陵
潛江里社虎渡二隄詔明年修築紹興二十八
年監察御史都民望言江陵東沿江北岸古隄
名曰黃潭建炎間邑官開決引江水為險阻以
禦盜既而夏潦漲溢荆南復州千餘里皆被其

害近因民訴始塞之乞令縣官隨方修補從之
元季沔乘兵燹之後人物彫謝土地荒蕪
明興江漢既平民稍墾田修隄是時法禁明白
人力齊壹隄防堅厚湖河深廣又院少地曠水
至即漫衍有所停洩賈讓所謂大川無防小水
得入陂障卑下以為汙澤使秋水多得有所休
息左右游波寬緩而不迫是也故自洪武迄成
化初水患頗寧其後佃民估客日益萃聚閒田
隙土易於購致稍稍墾闢歲月寢久因攘為業

志八

河防

三

又湖田未嘗稅畝或田連數十里而租不數斛
客民利之多瀕河為隄以自固家富力強則又
增修之民田稅多徭重丁口單寡其隄壞者多
不能復修雖院必有長以統丁夫主修葺然法
久弊滋修或不以時故土未堅實丁夫或非其
數故工尚鹵莽夫院益多水益迫客隄益高主
隄益卑故水至不得寬緩湍怒迅激勢必衝嚙
主隄先受其害由是言之客非惟侵利且貽之
害也然大水驟至汎濫洶湧主客之院皆為波

濤雖曰主害亦匪客便也故漢書曰左隄強則右隄傷左右俱強則下方傷其謂此歟賈讓曰隄防之作近起戰國雍防百川以自利齊與趙魏以河為竟趙魏瀕山齊地卑下作隄去河二十五里河水東抵齊隄則西泛趙魏趙魏亦為隄去河二十五里雖非其正水尚有所遊盪時至而去則填淤肥美民耕田之或久無害稍築室宅遂成聚落時至漂沒則更起隄防以自救稍去其城郭排水澤而居湛溺自其宜也其事

志八

河防

四

頗類於沔成化甲午弘治庚申水大漲正德丙子復漲丁丑如之皆乘舟入城市隄防悉沉於淵民淺者為棧深者為巢飄風劇雨長波巨濤煙火斷絕哀號相聞湛溺死者動以千數不特漂沒田廬而已此則民救死而不免也何有於隄防哉故沔民之敝始於成化極於正德瘡痍至今未之復也其後都御史秦金布政使周季鳳以江水常決監利之車木隄漢水常決潛江之班家隄俱修之其丈以千百計然未能高堅

水至即崩弛嘉靖甲申知州儲洵以沔之利害莫大於隄防博求遠訪具知其要害迺上疏曰臣聞禦患不救其源則勞於為役而敝壞日甚計大事或惜其小則功未及成而併棄其初未有慮之不深圖之不固而能興可大可久之利者也臣待罪沔陽伏見其地南臨大江北枕襄漢西南二百里至監利西北二百里至潛江北二百里至景陵東北二百里至漢川地勢卑窪湖泊相連正係江漢下流原無岡阜障蔽諸水

志八

河防

五

奔赴若就大壑民田惟土築扞院防衛耕種成化弘治間湖池深廣隄防堅固雖遇江漢水發易於防洩為害未深自正德十一二年大水泛溢南北江襄大隄衝崩湖河淤淺水道閉塞院墜倒塌田地荒蕪即今十數年來水患無歲無之上厯

聖慮曲荷拯援賑貸蠲租

恩至渥矣臣惟重厚之澤豈宜屢覬而思患預防尤貴及時且江漢之水每夏秋之交鮮不溢

發使沿邊之地漫無防護徒於諸院小小補塞則高水湍悍勢若土崩至則衝突何功之有臣聞南自監利車木堤水口衝塌每遇川江水發不惟其縣受害而沔陽後烽茅埠凡一十六村熊家淠潭凡四十餘院稅糧八千餘石高低滄沒尺土不堪耕種自潛江排沙頭班家灣新開便河及沔陽石牌鋪諸處水口衝塌每遇襄漢水發則潛江景陵二縣沔陽深江西范凡二十七村蓮河柘樹凡七十餘院稅糧一萬五千餘

志八

河防

六

石亦無尺土耕種加以房屋漂流牲畜溺死巢居野處動經屢月束手就斃言之痛心前隄雖屢經撫按遣官修築但地方廣遠工力繁鉅增卑培薄易就傾瀉以臣觀之大患之後弊壞已極使非補天之功而欲禦建瓴之勢吾民不為魚鱉鮮矣伏望

聖慈軫念生民憂患

勅下戶部查照蘇松修舉水利故事轉行湖廣撫按并提督水利諸臣酌量計議遣官隨地相

度大江則自監利而下以及沔陽襄河則自安陸而下以至漢口大約俱不過三百里之地沿邊堤岸何處可以仍舊何處可以增修如車木堤排沙頭班家灣潛江新河諸處尤為上流利害切要之地若舊堤不堪繕整客士卒難堅固則移入近裏或數百步或半里許度地形之高卑驗水勢之緩急創築新堤委曲延袤務使高厚堅完永堪障蔽雖遇水發不致衝漫如礙有糧田土勘實奏免非如虛當勞費所謂漢人治

志八

河防

七

河之下策斯善矣然修築事宜工力頗繁即今民窮財盡若復越外取給則患未及除而首先受弊祇益其狼狽耳臣愚伏請查撥均州香錢或借支司庫官銀或將沔陽監利潛江景陵起運稅糧每石連耗徵銀一兩比照災傷之例免解本色每石准銀六錢解京其餘扣留在官以備顧募工食之費仍候秋冬農隙每州縣起夫各數百名併力修築量支口糧即充賑給庶公私兼舉力役易完從前沮洳盡成膏腴稅糧有

資耕治不廢方千里之民受無窮之利轉災為福端在于此矣臣又聞之宋臣張綸之為發運也以通泰海州皆瀕海潮水日至城下田土斥鹵不堪稼穡請築捍海堤於三州之境長數百里以衛民田朝議從之踰年堰城不惟當時民享其利至今通泰楚海迄無風濤之患其利溥矣況今所奏比之捍海之役其易十倍工力之費視一年蠲免與內帑出給之數纔十之三四而已記曰利不十不變法況法不必變而受利

志八

河防

八

什百寧忍坐視患害而莫之救哉疏奏事下撫巡舉行會洵遷官而都御史黃衷合藩臬諸臣議以工大費冗且時已迫猝難盡舉按察副使劉士元建議龍淵而下凡九區為要衝宜先事事迺出司藏千金于沔而中分于景陵遣斷事艾洪董其事洪復益以滄浪而下凡五區於是龍淵花墳牛埠竹林西流平放水洪茅埠玉沙瀕江者為隄統萬有餘丈大小朱家滄浪南池瀕漢者為隄統幾萬丈

叙嘗為之前記碑

於是洵

之策雖未盡行而江漢頗有所捍明年丙戌夏四月江溢至于六月五月漢溢六月連溢加盈焉秋七月復溢如初沔賴以完而百穀用登斯亦洵策之效也未幾潛江河害城邑縣官奏開新河以殺之謂之恩江於是河益猛迅如建瓴然而班家諸隄直擣峻衝沔民憂惶請罷其役而潛人以縣治危迫必欲濬之潛沔交爭如訟後其河隨淤水為不流嘉靖庚寅漢水決拖船埠西湖水溢沔之西北遂為巨浸知州曾儲判志八

河防

九

官蔣賢因塞之洵之疏卒無施行者

長官隄在州南百石湖隄在州北高隄即復州故城

隄永豐隄在縣北護城古隄在縣西南宣德中知

縣縮弘治中知縣端復周公隄在縣南自古

隄長三十里皆汗下弘古隄有五里在縣東北

水班隄在築下以白湖村山山傳魯班便隄在湘渡

史氏曰昔者先王不防川不竇澤是故水土演而民用也班固謂經無隄防雍塞之文以為起於戰國然禹陂障九澤而單襄公亦云陳之澤

不陂障則其事又先王之制矣夫䟽河濬川所以豐物也湮痺塞汙所以防溢也沔之水患無歲無之非有隄防不其魚乎洵之䟽賈議之上策也其為沔慮詳矣舉而行之無難也郡之利害余故備論之

贊曰雲夢豬澤江漢匯流溢決為沔隄障肇修捍彼洪波墾茲良疇博哉洵䟽惠我民休

志八

河防

十

河防